



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



TAPAK 8

Army lenir aitsüba sülen Russian general ka mapa nungi anentsü

Mirabai Chanu-i anir World Weightlifting Championships asayatsü



VOL. XX NO. 271 (ADOK 271) DIMAPUR ROGONÜ (FRIDAY)

CHITENI (JULY) 14, 2023

₹ 5.00

MTBA-i lanur 12 nem pei jangraba mapa tenzüksü atema sen terara aputsü

Mokokchung, 13th July (TYO): Mokokchung Town Baptist Arogo otsü nung tapak tasen ka asütsüsa MTBA kübok Skill Training Entrepreneurship and Placement (STEP) ludeni ayongzüka lanur ishika nem pei jangraba mapa tenzüksü (startup) atema senotsü terara aputsüba mapatong ka tenzükba den shishilembaba dak sentakba nung shisatokden sentong tajung ka parnok senden kilem nung kaogo. STEP mapatong kübok lanur 12 nem pei jangraba mapa balala tenzüksü atema arogoi tetemlok meketi sen terara aputsüogo. STEP ya mission mapa ka lir aser ibai tongtibangsa lanur mapa makartem mapa inyakdaksütsü maongka lapokstüba den pei sasa tepok sünga taküm liteta odaksütsü aser lenmangtem tuyutsü nükjidong nung tenteba lir. Iba sen ya tetemlok meketi aputsü saka tapurtemi mapang tetaktet ka lir tesülen sentsüh ji aotsü.

Tanü shisatokden sentong nung shisalen sayur Mokokchung Chamber of Commerce & Industry (MCCI) tir aser STEP luden nung züngsem, Tsükti Longkumer-i jembidang, shishilembaba mapa koda tenzükker aser shishilembar kaji shiba, parnok dak kechi jakla aketsü tim item onük dak ajemdaker tagitsü onük aika rateta ashi.

Shishilembar ka jagi nübur taginüba/ungdakba metettsüla aser pai/lai inyakba mapa jagi

nübur nem tajangzük agütsütettsüla, ta pai ashi. Shishilembar (entrepreneur) kati rongsen aahba dang masü pai/lai mapa yanglua nüburtem nem mapa inyaksü maongka lapokstür aser alima rongsenkettsüing renloksü atemaji shishilembar tem dak tulu keta lir, ta paisa shisem.

Paisa shishilembar ka dak lidaksünüba jakla kar lemsatepdang, pai/lai nüburtem nem service tajung agütsütsüla, rongsen aser senotsü junga ketdang sütettsü tim, meranga inyakba den rongsen rizüingba (savings) sobaliba benshütsüla, ochishiba, mapang amshiyim metettsüla aser shishilembaba mapa inyaksü atema timtem aremtettsüsa jakla alitsüla, ta paisa ajungshia liasü.

Asen yimti renloka aotsü asoshi liso shishilembaba (local market) kati ka ajungshiteptsüla, kechiyong iba inyakyim nungji kati ka ajungkettsür aser yangji tajangzük aika keta lir, ta paisa kuli den tatishitsü kar bener arua lemsatep.

Takom angutsü atema lenmang anasaba mali, teinyaktsü ajak agi erangtsüba dang, kodang meranga inyakdir, yamaji tia tajungba moatsür, ta paisa shisem.

Iba sentong nung MTBA Pastor Rev. Ponen Longchar, Assoc. Pastor, Rev. Temsuwati, Rev. P. Chuba Jamir, Assoc. Pastor & STEP Convenor, Monglier parnoki shilem balala agia liasü.

Assam-i UCC busemer, polygamy nokdangner: CM Himanta

Guwahati, Chiteni/July 13 (Agencies): Assam sorkari Uniform Civil Code (UCC) busemer aser state nung tekeratiba nung polygamy nokdangner ta ketdangsur nem osang agütsüogo, ta Assam Chief Minister Himanta Biswa Sarma-i Brehostibarnü ashi.

UCC ken o ya Parliament ajanga dang telemtetba agitsü saka Tir temelaba nung state-ia telemtetba agitettsü, ta Sarma-i Guwahati nung sentong ka agitsü lia ashi.

"UCC nung ken o balala lir aser Law Commission aser Parliamentary Committee ajanga ibaji asadanger. Assam sorkari UCC busemer ta osang agütsüogo," ta chief minister-i ashi.

"UCC nung telemtetba magi liaka yangji aliba nungi onoki polygamy (kinungtsü-kinungbo ka dak tali yutetba) ya agiteta tekeratiba nung tenokdangba agütsüner. Iba yimya nung tenokdangba agütsütsü asoshi September ita taruba assembly session nung onoki Bill ka benoktsü sentong lir," ta pai ashi.

State sorkari iba Bill ya kuli kar ajanga mebenoktetra, January session nung renema jembitsü, ta BJP lenir Sarma-i ashi.

"Kasa mapang UCC ya mapa kuma amshira, onoki iba mera agitsü menügdaker, kechiaser ibai UCC nung adentsü," ta pai ashi.

Congress-i UCC anema nokdakba indang jembidang, 'Congress lenirtemi Muslim tsürtem timtem mangateter, parnoki (Congress) parnok indang vote agir saka kecha meyipa magütsüner', ta ashi.

Congress-i Muslim nungter tetsür aser tebur indang vote bo aginer saka parnoki tebur dang tenzükner, ta Sarma-i ashi.

"Nabi (The Prophet)-ia polygamy maginü aser Muslim nungter ajak kinungtsü ka dang alitsüla ta ashi. Islam asoshi item ya tongtipang lir. Vote kar akoksaka Congress-i polygamy busema mekazüi Muslim tsür den nokdaksüla," ta pai ashi.

Congress-i 'triple talaq' nokdangba anema nokdak aser tang UCC anema nokdaker, anungji parnoki lenmang ka nung Muslim tsür anema rara ayonger, ta pai ashi.

UCC ya kiyimba, balalulaba aser senmangren nung tamangba yimsü, kin mesüra danga yimsü-yimbong mebensai India senso ajunga asoshi ozüing kasa indang lir.

Manipur azütokshi: EU parliament-i BJP aitsü, AFSPA agientsü akhang

Strasbourg, Chiteni/July 13 (Agencies): India Ato Kilonser Narendra Modi Bodhbarnü France-i aoba mapang European Parliament nung Manipur azütokshi dak sendakba nung pangzüng ka renema BJP nung lenir kari 'nationalistic' yimya nung jembishinüba aser inyaksangshiba sashi-sashia aitsür ta ashi, koba linük telungzük indang ken o ka dang lir Indian sorkari ashir.

Strasbourg, France nung European Union züngsem ajak ajurutepa tang temendak senden nung Manipur nung kin ana tsüingta mepetmesü adoka aliba nung meimchir temeden, democracy aser ozüing alema inyakba indang o inteptsü Parliament agenda liasü.

India nung Manipur tensa indang nung European Parliament pangzüng atema onük benokba nung European Union dang India den inyaksangshiba nung 'meimchir temeden aser democratic value' tiyong sädaksütsü ayongzüka liasü.

Manipur nung azütokshi ajanga nisung takum samaba aser ki o jen raksaba aitsüba mapang EU Parliament indang pangzüng nung, Bharatiya Janata Party lenir kari 'nationalistic rhetoric'

amshiba tematiba nung aitsür, ta shia liasü.

India sorkari iba ken o ya linük telungzük indang teblemtsü lir ta shiaka EU Parliament-i linük nung iba tensa aitsüba mapang, 'nütsüing tajemba, civil society, human rights asoshi nokdaker aser osangbener tem teti timtem ajurur, talisa tetsürtemi timtem tali ajurur aser tribal aser tamangba yimsü dak sendakba nung par temeden anema inyaker, tashiyim amshir aser merenshir," ta ashi.

2020 küm October ita UN High Commissioner for Human Rights ajanga India dang 'human rights defenders' kumzüka ayutsü ashi aser civil society tem asoshi talenba balala yoka alibatem atema teblemtsü lemsatepa liasü aser BJP indang "divisive ethnonationalistic policies" anema human rights organisation temi ola adokba meteta lir, ta iba pangzüng nung tuteta ashi.

"India kübok Manipur state nung azütokshi tenzükba ya ethnic aser tamangba yimsü tsütsü talisa Hindu nung Meitei kin aser Khristanpur Kuki kin tsüingta lir, aser iba ya ajanga nisung 100 dak tema tepsetogo, 40,000 dak tema tesem balala nung jenshia lir aser ki o jen aser

tekülem ki tem raksatsü. Manipur nung taoba mapang telungpur temi linük nung adentsü memolungi nokdaka liasü aser iba mapang meimchir temeden anema mapa tamajung inyaka liasü. Ano tang azütokshiba nunga Manipur aser linük nung BJP-i aniba sorkari telemsa adokdaksüba 'ethnonationalistic policies' amshia tamangba yimsü tsütsü kin tilatem ajemreptsü meranger ta human rights telok temi ashir," ta pangzüng ajanga ashi.

EU Parliament ajanga India aser Manipur nung aliba ketdangsurtem dang nüburtem asoshi teyari balala agütsüba nung tenokdangba magütsütsü aser shinga dena sendaktepa maliba telok nem bushisüing dang sädaksütsü, yimten yimsüsür dang mangatetep adoktsü o mejembitsü, tensa tajungba kumdaksütsü asoshi ajak den kasa tetsüingtai ia jembishinütsü aser ano Centre aser state sorkari anir tetsüingtai ia yimjung yanglutsü ayongzüka liasü.

Parliament ajangasa region nungi mangatetep aliba Armed Forces Special Powers Act (AFSPA) agientsü aser internet services tanaben agütsütsü ayongzüka liasü.

Nagaland Governor-i Naga Back Basket indang Postal cover saya



Nagaland Governor-i Naga Back Basket indang Postal cover sayatsüba noksa nung angur.

Dimapur, Chiteni/July 13 (TYO): Nagaland Governor La Ganesan-i July 13, 2023 nü Raj Bhavan, Kohima nung Naga Back Basket indang Postal cover temeja ka saya liasü.

Iba Postal cover sayatsüba mapang Governor La Ganesan-i ashiba agi, Naga nungter asoshi Naga Back Basket (taksep) ya kanga tongtipang lir.

Ibai Naga tsürtemi tzü, tatsütsü süng, jang mesüra aonsotsü abenba kisüing masü saka temeim sayua tsürabor temi jala nem sempet ama agütsür, ta pai ashi.

Tetsür temi mapa inyakba aiben kibong nung mejembir. Naga Back Basket ya yimdak yimtsüing nung Naga tsür temi inyaksangshiba, mapa aser temeim den sendaktepa lir, ta pai ashi.

Department of Postal, Government of India ajanga Naga Back Basket indang Special Covers sayatsü asoshi inyakba atema Governor-i pelaba lemsatep aser ibai Naga nungter tetsü aser tetsürtem ajunga tenüing nung lir, ta ashi.

Teburtem alu wadang nungi kidangi meyipa shilanger azünga aliba mapang molok-metok ya yanglur, ta Governor-i ashi.

Akhi alemli mapang takyatakakor balaka meliasü aser tebur ajaki pei molungba nung molok-metok pei kibong asoshi yanglua liasü, aser ibaji ajanga rongsenketzüng tsütsü pei peria aliba sayur, ta pai ashi.

Nagaland nung sobaliba aser yimsüyimpong tsütsü kanga takar lir, saka mapang melenshia arudang lanur temi itemji mamshir, saka tain temi ibaji angateta Naga nungter lokti tentet aikati lanurtem dang sobaliba balala sayutsü mapa inyakba ngua pelar, ta Governor La Ganesan-i ashi.

Asen sobaliba wazüka ayuba nung temolung agütsüba ya kodanga manentsüla, kechiaser ibai aser ayak lir, ta pai ashi aser Postal department ajanga iba ama sentong ayongzüka asoshi pelaba lemsatep aser iba yagi sobaloba aser yimsüyimpong wazüka ayuba aser temaba jenjangi ajungkettsü merangba nung ajungmesotsü, ta ashi.

Iba sentong nung Superintendent of Post Offices, Nagaland, L. Tiken Singh-i jembidang, Naga Back Basket indang special cover sayaba nükjidong ya Nagaland nung teka mapa tali nungtugu kumdaksütsü asoshi lir, ta ashi.

Molok-metok yangluba sempet ya Naga nungter takum nung anogoshi tongtipang shilem lir, aser Nagaland nung kin shiai molok-metok yimya balala nung yangur, ta pai ashi.

Nagaland Postal Division ajanga Nagaland nung GI tag aliba product pezü - Naga Mircha, Naga Tree tomato, Nagaland Sweet Cucumber aser Chakhesang Shawl - indang Special Cover sayaogo, ta paisa ashi.

Iba sentong nung Secretary to Governor, Rajesh Soundararajan, Raj Bhavan Kohima nung ketdangsur aser staff tem aser Postal department nungi ketdangsurtem dena liasü.

Iba sentong nung Kevikhrielie Kirha menden liasü aser Assistant Superintendent of Post Offices, Nagaland, Deepak Chandra Das-i melepzüing o jembia liasü.

Mokokchung DPDB senden menogo



Ita shia amenba Mokokchung DPDB senden July 13 nü Advisor Water Resources Govt. of Nagaland & Chairman DPDB Mokokchung Tongpang Ozukum lenisüba nung DC Conference Hall nung menogo.

Dimapur, Chiteni/July 13 (TYO): Ita shia amenba Mokokchung District Planning and Development Board (DPDB) senden July 13 nü DC Conference Hall nung menogo.

Iba senden ya Advisor Water Resources Govt. Of Nagaland aser DPDB Mokokchung mendenbuba Tongpang Ozukum lenisüba nung mena liasü.

Senden nung mendenbubai board züngsemtem dang NPSC & NSSB tatidang atema district nungi tejangrartem asoshi coaching centre ka amenoktsütsü sentong aliba indang metetdaksüogo, koba District common pool fund nungi senotsü teyari agüja amenoktsü.

Taoba senden minutes lepa reprangshiba mapang house-i, Mokokchung nung Nagaland Chief Minister agizüktsü asoshi

inyaksangshitsü lemtet. NST office ISBT Yimyu-i belener aotsüba indang jembiba mapang mendenbubai ken o dak sendaka aliba department-i teyanglushitsü lira yanglushitsü atema office amenoktsü aliba ki asadangtsü asoshi Deputy Commissioner nem nongloktüsü. Mokokchung-i Urban Development Officer yoktsüba indang jembiba mapang mendenbubai house dang ken o dak sendaka aliba department-i iba ken o tejakdangi bener aotsü tenangzükba agütsüba metetdaksü.

Senden nung District skill committee, Mokokchung-i, Mokokchung nung Job Fair ka ayongzükba agitsü sentong aliba dak sendakba nung power point presentation ka agütsü aser iba sentong ayongzükba agitsü aliba

indang sensaksema liasü, kong Rural Development and SIRD Minister Metsubo Jamir, Advisor IPR and Soil & Water Conservation, Imkong L Imchen aser tanga züngsemtemi parnok tebilemba lemsatepa liasü.

House-isa, DPDB senden nung department temi power point presentation agütsütsü asoshi bangjem aser taruba senden nung Medical & Agri department-i power point presentation agütsütsü Deputy Commissioner-i nongloktüsü.

Maneni house-i Mokokchung nung Multi-Purpose Stadium kanga junga yanglushitsü atema bangjem, kechiyong District nung taküm küm tatemlen North-East Badminton & Table Tennis Championship ayongzükba asayatsü lir.

Longleng nung nüburtem kümdangshia alitsü metetdaksü


Diampur, Chiteni/July 13 (TYO): Longleng jila aser temeket nung auer tali kuma aoba dak sendakba nung ketdangsurtemi nüburtem dang kümdanga alitsü metetdaksüogo.

Nüburtem dang mejangjaba

dokan aser nisungtem nungi osettsüt aliba mapang kanga kümdangtsü metetdaksüogo. Temulung maslemsüsa inyakym kar danga ngutetra takaratiba nung police tem nem metetdaksütsü tetuyuba agütsüogo.

Nüburtem shirnoki auyuba oset aliba, ayokba nung shilem agidir parnok Indian Penal Code 1860, Section 411 kübok merenshitsü kong tepuokdak küm asem ayutsüba aser senchi dena achitsüba densema lir.

Mkg. Police-i mim mozü shishilembar 4 apu



Mokokchung, Chiteni/July 13 (TYO): Mokokchung Police-i 11-07-2023 aonung 22:45 nung Arkong Ward Mokokchung ladanglara jajaba mapang Longsa nung Penli Ward nung alir Philip Pongen jabaso arishi kum 24 tain Imsulemba Pongen ajurua Imsulemba Pongen den asüngdangyaba mapang Arkong Ward nung alir Longkhum nung Bendangyanger jala arishi kum 28 tain Tuto Ao-i

Brown Sugar alinera alitsü arung ta ajaba agi aorba ta shipok, anungji Police-tem Imsulemba Pongen den anidaka ao aser Tuto Ao kidang bushitsüadang aser Tuto Ao kidang plastic soap container ka(1) nung Brown Sugar (sun flower) tsünga yua aliba ngutet.

Ano maneni Mokokchung Police-isa Khensa nung Yimyu Ward nung alir Imnalemba Jabaso arishi kum 33 tain Tekayabang Kichu aser

Chungliyimsen nung DEF Mon nung alir Asür. Watimeren jabaso arishi kum 49 tain Rongsenlemba tena ket nungi Brown Sugar (sun flower) gram 20 ngutet. Ronsenlemba ya DEF Mon nung Head Accountant inyakerta jangjaogo.

Iba tatalokba dak sentakba nung Mokokchung Police-i case register süogo aser buahitsüngdang agidagita Additional Superintendent of

THE LIFE CONCERN MINISTRIES (NAGALAND)

Welcomes you all

THE YOUNG & OLD TO A VERY SPECIAL

Musical Summer Nite

WITH THE CURRENT SINGING SENSATION OF NAGALAND

Mr. Tiameren Aier & Toshi Aier & Band and a host of other musicians.

Besides, we will have a Special Appearance of *Mister and Miss of North East teens of Nagas

* WE PROUDLY SHOWCASE

THE YOUNG ACHIEVERS OF NAGALAND WITH:



ARTIST MID SUMMER ACOUSTIC NIGHT



MR. VITOKA SUMI MR. NORTHEAST, 2023



MR. TONOTO MR. NAGALAND, MR. ALTITUDE INDIA AND MR. ALTITUDE WORLD PEOPLE'S CHOICE.



MS. IMJUNGWATILA LONGKÜMER GRAND MISS TEEN NORTHEAST 2023



MS. ESTHER T NGULLIE GRAND MISS TEEN NORTHEAST 2023



MS. JIME K. KHIAMNINGAN MISS GRAND NORTHEAST 2023 (STERLING)

DATE: 14TH JULY, 2023 VENUE: IMC HALL (AC) SUPPLY COLONY, DIMAPUR TIME: 5:00 PM Ticket available at Rs. 300 only, Online booking here +91 6009149289

Kidima yimtsüing nung nashi chang dak kom adoker



Diampur, Chiteni/July 13 (TYO): July 13 nü tashi nung Kidima yimtsüing kübok nashi ki ka nung Thutho (cattle) boil koma adokba osang metetdaksüogo.

Teküp nung adokba Thutho cattle boil ya mezüngbuba anogo ti tejakdang Kohima district nung Kidima yimtsüing kübok Kithozou shed nung poteta liasü.

Nashi chang teküp nung komo atokba ya tatsük nung tuluba kuma aor. Komo adoker aliba nashi chang tem ya chiyongtsü mechiyongnüi akümer aser tangola sashitsüa mesademi akümer.

Teküp nung komo adokba ya tanga tesem nung aliba nashi chang daka menatepyonga aotsü.

Kasa mapang nung nashi

kiburi ashiba agi, komo anepalutsü atema injection maneni tutsüba ajanga nashi ana tashi technu mepusa intokogo. Komo adoker aliba nashitem ya tanga ki ka nung yua lir, ta shisem.

Animal Husbandry aser Veterinary Services Sub-Health Centre nungi staff temi medical tsütsü kechi koma anepalutsü tim yamaji anepaluogo, ajisüaka tashidak menatepa aoba nokdangtsü atema temaba jenjang nung aliba ketdangsurtem teyari nüngdaker.

Animal Husbandry and Veterinary Services, Government of Nagaland tawabangba kübok Kidima nung Community Thutho Project ya 2021 kum November 29 nü lapoka liasü.

Mkg District Congress Committee Tsüngremmung benjong amungtsü

Mokokchung, July 13, 2023 (TYO): District Congress Committee, Mokokchung pur taruba August 3, 2023 nü "Tsüngremmung" benjong parnok kimen, Iminukshi, Alongmen Ward, Mokokchung nung ayongzükba amungtsü, ta DCC Mokokchung tir aser tongti zülur (Admin), Watimongba Aier aser P. Aley nati sangdong ka ajanga metetdaksüogo.

Iba sentong nung taoba MLA aser Nagaland Pradesh Congress Committee (NPCC) tir, S. Süpongmeren Jamir

tetushi tesemdanger asütsü jaoka lir. Iba sentong ya anepdang 10:00 ako nungi tenzüktsü aser sentong temer benjong chiyungba alitsü.

Anungji, taoba Congress Minister-tem, MLA-tem, PCC Members, Mokokchung district nungi ACCC ketdangsurtem, DMCC aser NYC ketdangsurtem, DCC Advisor-tem, Seva Dal, NSUI aser District Executive ajak iba benjongi arua shilem agitsü asoshi kasa sangdong nungsa shisem.

Delhi nung Yamuna ayong tzü agi tesem aika nung tzü metsünger



July 13, 2023 nü, Red Fort (Delhi) nung tzü metsüngbanga aliba noksa nung angur.

New Delhi, Chiteni/July 13 (Agencies):

Delhi nung Yamuna ayong nung tzü level metre 207.49 tashi atuogo aser ibaji tesüiba kum 45 tsüngda tang level teimba atuba lir.

Yamuna ayong nung tzü tali metsüngba ajanga kiyong aika nung tzü metsüngbanga aser nisung meyirjang aikati pei ki toktsür aienshiogo.

Bodhbar nikongdang 1:00 ako tashi nung Yamuna nung tzü level metre 207.49 tashi atua liasü aser ibaji ajanga Yamuna ayong tepdanga yangluba apu pezü nungbo train ghonda ka nung kilometer 30 tashi dang keraa senzüsü Delhi Metro Rail Corporation (DMRC)-i tuyu.

Delhi nung tzü metsüng tensa asadanga senden amenba sülen Chief Minister, Arvind Kejriwal-i Amongnü tashi schools, colleges aser universities shibangtsü tuyuba den külemi nüngdakba services dak alaka office ajak shibanga

pei kidang nungi dang mapa inyaksü tuyu.

Delhi Disaster Management Authority (DDMA) senden amenba sülen Kejriwal-i, "Water Treatment Plants 3 shibangogo aser taruba anogo ka-ana tsüngda nisungtemi tzü nüngdaksü anungji tzü ration agütsütsü. Relief camps nung metsümeshidak aser tzü chigodak timtem adokba ajanga relief camps school tem nung amenoktsü," ta metetdaksü.

Yamuna ayong nung tzü tali metsüngba ajanga iba ayong tzü agi Red Fort-a tongogo. Iba dak alia Nigam Bodh Ghat, Old Yamuna bridge - 'Loha Pul' aser Kashmere Gate nunga tzü tali metsüngbanga. ITO (East Delhi nungi Central Delhi aser Connaught Place lenmang) aser Ring Road nunga tzü metsüngba ajanga gari senzüsempoong tsütsü timtem tulu adokogo, ta ketdangsertemi metetdaksü.

Delhi sorkari sangdong ka

ajanga, "Yamuna ayong Old Railway Bridge (ORB) nung (Bodhbar) aonung 9:00 ako nung tzü level metre 207.95 liasü. Aonung 8:00 ako nung (Haryana nung aliba) Hathinikund Barrage nungi tzü Cusecs 1,47,857 chiokogo. Central Water Commission (CWC)-i ashiba agi tanü, July 13 nikongdang 05:10 ako tashi nung Old Railway Bridge (ORB) nung tzü level metre 207.99 ajungtsü," ta metetdaksü.

Osangbenertem senden ka nung jembidang Kejriwal-i, "Ali nemzüka aliba tesemtem nung alir ajak dang aienshitsu ni mepishir, kechiyong ajungbena tzü level teimba akümtsü aser nenoki lendong ajurutsü akok," ta metetdaksü.

Kejriwal-isa Centre sorkar dang Yamuna ayong nung tzü level iba dang nungjagi teimba makümtsü atema tiyongtsü aita inyakkdaksüner, ta mepishiogo.

PM Modi-i France aser UAE semdangtsü

New Delhi, July 13 (Agencies):

Brihostibar nungi tenzüka anogo asem tsüngda Ato kilonser, Narendra Modi-i France aser UAE na semdangtsü atema Brihostibarnü apusoa ogo.

France-i apusoa aotsü jakdang Ato kilonser Modi-i sangdong ka ajanga, pai France Tir Emmanuel Macron ajurua linük ana partnership tejakleni bener aotsü atema onük balala jembitsü yongyar, ta metetdakja liasü.

Prime Minister's Office sangdong ajanga, "Tir Macron ajurua tesüiba kum 25 tashi linük ana tsüngda tesendaktep aliba maneni tejakleni aotsü atema onük balala nung o lemteptsü yongyar. 2022 kum ni official süa France semdangba mapang nungi tenzüka ni Tir Macron aiben ajurutsüsa maongka nguogo, tang tesüsa May ita nung G-7 senden Hiroshima, Japan nung aliba mapang nung pa

ajuruogo," ta metetdaksü. July 14, 2023 nü France yimtiba, Paris nung Bastille Day parade nung Ato kilonser Modi tetushi tejaoker ama adentsü aser parade nungji India nungia contingent kati shilem agitsü.

India aser France na tsüngda asalentong tsütsü partnership yangluba sülen taküm kum 25 ajunger; India aser France na defence, space, civil nuclear, shishilembaba, investment, shisaliok aser sobaliba densema lenla aika nung amalitepa inyaker, ta pai metetdaksü.

Modi-isa, pai France Ato kilonser Elisabeth Borne, French Senate Tir Gerard Larcher aser French National Assembly Tir, Yael Braun-Pivet nungera ajurutsü yongyar, ta metetdaksü.

Modi-i France nung alir India nungertema ajurutsü aser linük anaprongla nungi CEOs ajurutsü.

France semdangba sülen July 15 nü pa Abu Dhabi (UAE)-i aotsü.

India aser UAE na fintech, defence, security aser energy densema lenla aika nung amalitepa inyaker.


Modi-i, "July 15 nü Paris nungi ni official süa Abu Dhabi, United Arab Emirates-i aotsü. Ni kü tembar UAE Tir aser yimsüsür, H.H. Sheikh Mohamed bin Zayed Al Nahyan ajurutsü yongyar," ta metetdaksü.

"Linük ana tsüngda shishilembaba, investments, energy, chiyungtsü security, science & technology, shisaliok, fintech, defence, security aser nüburttem tsüngda tesendaktep lir. Yaküm

Tir Sheikh Mohamed bin Zayed-i ni jaok aser tarutsü atema jembitsü asoshi ni melunga agizük. Linük ana tesendaktep ano tajungba akümtsü atema jembitsü ni yongyar," ta paisa metetdaksü.

TENÜNGSANG TETUSHI AGÜTSÜR

Chuchuyimpang nunger Wb. Aolemba Pongen aser Wt.Rongsentula Jamir tena jala **Kr.Kumzekinla-i** "Mobilising Mission Towards Children at Risk from Margins Perspective in Dimapur Churches" ta asüba Thesis nung Program for Theology and Culture in Asia (PTCA) and DBC nungi Doctorate of Ministry jenjang ajangzükta asoshi Chuchuyimpang Baptist Arogo aser Chuchuyimpang Arogo Laishir Telungjemi tenüngsang tetushi agütsür.



Tsüngremer kilitsüri tanelae wadang inyaka Tsüngrem kuli asüdang Tsüngremi takokma nung azükarua maojangmata Chuchuyimpang Baptist Arogo aser Chuchuyimpang Arogo Laishir Telungjem-i sarasademtsür.

Sd/-
Rev. I. Wati Imsong
Pastor
Chuchuyimpang Baptist
Arogo

Sd/-
Wb. Supongchiten
Tir
Chuchuyimpang Arogo
Laishir Telungjem

OFFICE OF THE AOLI LONGPOK SEMCHIR LEMTUR MUNG DANG

H.Q: MOKOKCHUNG

TENÜNGSANG AGÜTSÜR

Miss Watisangla Lemtur (D/o Mr. Tiameren Lemtur, Yaongyimsen), lai HSSLC tatidang nung Top 5 nung takok tulu ngutetba asoshi Aoli Longpok Semchir Lemtur Mung dang ajanga tenüngsang tetushi agütsür.

Teyanglur Tsüngrem-i tarutsü nunga ne wadang ano maneni takok manung aniangma.

Sd/-
Lipokyangler Lemtur
President, ALSLM

Sd/-
Tayongtemsü Lemtur
Secretary, ALSLM

Odisha nung nisung shi achiba atema nisung ana apu



Bhubaneswar, July 13 (Agencies):

Odisha nung Mayurbhanj district kübok Bandhasahi yimdak tasü mang arongba moapu nung nisung anati tasü mang terongtu techidak mapang nung puogo; tenapronglaji yi agi meseper liasü, ta police-i metetdaksü.

Arrshi kum 58, Sundar Mohan Singh aser Narendra Singh (25) napronglaji Dantuni yimdak nungi lir; police-i IPC kübok arrla balala nung ken o ka benokogo aser tenaprongla dang asü ngdangyatsü, ta police-isa metetdaksü.

Police-i ashiba agi, Mongolbarnü Bansahi yimdak nungi arrshi kum 25 tetsür, Madhusmita Singh shiranga lar kinü ngertemi la hospital-i anir ao, ajisüaka la süadokba sülen post mortem agitsü atema tasü mangji Baripada Hospital-i bener oa liasü.

La tasü mang terongdak mapang nung tebur ana jagi shi terongtuji bener oa achi. Ibaji ngua asür kinü ngertemi tena apuba sülen yimsüsürttem dangi anir ao. Yimdaklirtemi tejashi nung tena lisü agi alener azük aser tena ket nungi shiji apu.

Tzü mopung lendong ajanga nisung asüba ajema kumogo: IMD

New Delhi, July 13 (Agencies):

India nung tzü-mopung dak sendakba lendong balala nung nisung asüba kanga ajema kumogo, ajisüaka kiojen raksaba ajanga takoksa angubabo teimba-teimba dang akümer, ta Brihostibarnü India Meteorological Department (IMD) tongti, Mrutyunjay Mohapatra-i metetdaksü.

Mohapatra-i, "Tesüiba kum ishika tsüngda nisung asüba ajema kumdaksüogo ajisüaka kiojen takoksa angubabo teimba dang akümer, aser ibaji linük nung loktiliba-rongsenketzü ng terenlok ajanga lir," ta metetdaksü.

India nung kum shia tsü ngperet/tsü ngi agi nisung 2,500 shi asür; asenoki yipru mopung lendong nung nisung

asüba nokdangtetogo, ajisüaka tsü ngi lendong ya tayongzükba ka lir, ta pai ashi.

"Tsü ngi ya lendong tilaka dang aser iba lendong atema mapang tatsüka dang agir, anungji tsü ngi lendong jelia takzüsüji kanga tasak," ta pai ashi.

India Meteorological Department, Ministry of Earth Sciences aser Indian Institute of Tropical Meteorology senteper tsü ngi lendong jelia takzüsü atema modeling system ka yangluogo, aser iba system yangluba linük pongu rongnung India densema lir, ta pai ashi.

1970 nungi 2021 kum tashi nung India nung tzü-mopung dak sendakba lendong 573 nung nisung 1,38,377 süogo (World Meteorological Department).



TIR YIMYIM YIMOBILEM (EDITORIAL)

DIMAPUR ROGONÜ, CHITENI (JULY) 14, 2023

Govt. School junglasang !

Joko, 2023 küm ita tenetbuba nung jajar saka tang tashi Zunheboto district kübok Akhakhu yimtak Govt. Primary School nung government-i tesayur kata meyoktetbaji tesümgangtsüka aser tezüdangtsüka bilemer. Iba school nung zünger tanur 50 dak tali lir aser itemji tsüraburtemi tangalen oa azüngtsü asoshi makoker, anungji tang tashi item tanurtemjibo school metenzükteni atatepdagi. Iba yimtak School Managing Committee nung mendenbubai ashiba agi, iba school nung yaküm 2022 kümbo tesayur kabo liasü, anungji iba tesayur denji yariteptsü atema par yim council-i ita sen senpak 3000 agüja tesayur ka yua liasü. Ajsüaka, government-i tesayur ka yokbajia post dena yimer dang kecha meshishii bener oadoker liasü. Aji asenok meyong School Education department 2023 küm tom osang asütsü. Nagaland nung Govt. Primary School, Akhakhu amaji ano aika alitsü amai Nagaland School Education department dak temulung melemi bilemer. Ashiko, Kohima nungi School Education department reprangtsü asoshi shimteta toktsürtemi Akhakhu nung Govt. Primary School ka lir ta memeteti alitsüa akok, kechiyong metet asübo tesayurtema peria yoker lila aser khen anaben kabo semdang lila . Ano, School Education-i mangu aser memeteter dang ashi, ano government school aika nung tesayurtembo peria lir saka tazünger mali ta alitsüa akok. Ashiko, ano government school kar nungbo school tanurtem dang nungi tesayurtemang teimba ser alitsüa akok. Ajsüaka, Kohima nung alirtemi itemji memetet aser mangur. Ashiko, Kohima nung School Education Directorate ki sen aika endoka onsara sadema aser junga yangluba agi yangji anisüngzüka mejanger asütsüa akok. Nagaland government inyakim ajak nung ochi putu tasen ka tenzüktsü nungdakba reprangtetra, aji shitakba agibo School Education department nungi tenzüktsüla, kechiyong yimten aser lokti atema teindang nisung yanglutsürji School Education department lir. Ajsüaka, Nagaland nung tanü putu dang masü saka asüng lanu putu tashi majungtsüsa School Education deparment-i anir pei mapa, khuret aser department nükjidong tezülen aginüa yutsür " ozü atema sen angur asü, mangur ?" ta asüba nung ketdangser ajak temulung yur inyakteper. Ibayongji, Kohima nung Nagaland government kübok department kiojenbo ajak tetokteper amai tajung aser tulu dang yanglua angur, ajsüaka ki ajungba dang ashi mapabo majung aser meshitak dang angur. Aji oda, Kohima nung School Education Directorate ki apibo Akhakhu yimtak Govt Primary School nung tesayur kata malia ta asüba osangji mangmangtsüka lir. Office ki o asen mapa na meputep aser asen mapa agibo ita sen agizüka agitsüabajibo yutsür chisua malang ta ashitsüsa lir. Shitakba ya asangsang nung Nagaland School Education department-i inyakner na ? ta mamangjaika bilemer. Aji oda, Nagaland government yabo kisüjentsü atema dang küm tet ama, sen apuli office ki süli, sen apuli talitsü ki süli ta asüba dak alaka Nagaland nung alir tajung kümdaktsütsü asoshibo indangindanga inyakba sentong kata mangur. Ashiko, tanü Nagaland office ki tajung nung tashi tulu bener amenertem yagibo talir danga alinungbo Nagaland ya yoker tanga state nung oa alitsüang bilema alitsüa akok. Iba amajika mebilem nungbo, Nagaland ajungtsü asoshi kecha meinyak ser sen sen dangbo bushia mamongtsü. Aji oda, Nagaland yoka machitsü bilem nungbo Akhakhu nung amaji government school nung tesayur kata mali yutsütsüabajibo maremtsü. Aji oda, Nagaland meim nungbo government school-tem nung tazünger mali ser tesyurtem meyoktsü. Aji oda, Nagaland meim nungbo government school nung tanurtem dang nungi tesayurtem teimba asüba school tiatemji meteta yanglushitsütsü. Nagaland majungbaji ajak majungba agi majunger saka tamajungertem rongnunga shilem tulubajibo School Education department agitsü. School Education department junglasang, tanga department-tema jungla, kechiyong school-ji tajung aser shitak inyaktsü sayudak lir.

OLEMSABANG

TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

~ Temsüyanger, CTC (source:- Mitkar)

(Yashi adok nungi...)

4. Külemi Inyakertem (Team) aser Tongtisürtem Mosai Shimteta:

"Ni kü kijai nenok khu abentsü makok....anungji ni nenok kidong shia nungi tanishirtem shisa taka aser ajaki akhüm tsüba aliba nisungtem shimteta....tanishirtem yutsüogo" (Tazüng. 1:9-15). Ibai chichia telangzüba aser ochi telangzüba ka lir.Ibai otiotia tesayuba aser ajemaluba ta sayur. Iba yagi Mosa pei asoshi bilemba nisung masü ta sayur. Iba yagi maneni sayur, lenir ka jagi kechi nükjidong aji metettsüla aser aji ajangzüktsü asoshi arok/külem inyakertem külem telungjem mapa kanga tongtibang ta sayur. Anungji lenir ka taküm nung pei teka nung kechi mapa lir aser kechi nükjidong aji metettsüla, aser ibaji ajangzüktsü asoshi arok/külem telungjem mapaji kangasa tongtibang. Mosa lenisüba ajanga kangasa junga külem inyakertem telungjem aser maparen ajangzüktsü.5. Tatitang Nung Tsüktsü Lendong Tekümdangtsü Nüburtem Dang Ajungshiba:

Kodang Mosa Sinai tenem nungi talangka malu, nüburtemi Aron dang adenshia ashi, "Mosa shiba asenok Ijip lima nungi aniteta anir aru, pa kechi aküm onoki memetet; anungji asenok len anitsü asoshi tsüngrem ka yanglujang" (Ani. 32:1). Idangji Kibubai Mosa dang ashi, "Yakta meyipa luang, kechiaser ne nübur shirnok nai Ijip nungi anizüka anir aru; parnok raksa-a kümogo. Ni melaba lenmang nungi parnok meyipogo, parnoki hon agi nashi süngyanglu ka muluteta iba nemji tarongba tenla agüja külemdaki. Ibaji parnok tsüngremtem; shibai parnok Ijip lima nungi anir aru ta parnoki ashir. Ano Kibubai Mosa dang ashi, iba nübur tekong temerang ta ni ngugo. Anungji kü ain tulu parnok anema adoka parnok samatsütsü asoshi tang kü kija tokjang. Aser ni na agi kin tulu ka kümdaktsüdi" (Ani. 32:7-9). Kodang Aroni nüburtem jabang mayimi kümdaktsüba ajanga tsükchirtemi sensatsüogo ta Mosai angu (Ani. 32:25), asüngji Mosai nüburtem dang ashi, "Nenoki tetsübuttsüka temenen menaogo. Saka ni tang Kibuba dangi tua nenok asoshi temenen pungitsü atema ni pa dang mepishitsü" (Ani. 32:30).

Mosai nüburtem temenen asoshi jembi aser parnok menen pungitsu asoshi Kibuba Tsüngrem dang mepishitsü nangzük; pai nüburtem ajungshi, saka nüburtemi taküm mesüra tasüba, temoatsü mesüra atakatem shimtsü asoshi ayongzük. Tashi angaba ajanga temoatsü, takokba, yimjung, azükaro aser yimjiyimjung, saka tashi mangaba ajanga tashitak, ayawara, takoksa, alar tia, pei senmang samaba aser taküm temoatsütem ajunga samatsü indang ayongzük. Mosai talisa nüburtem tamangba tai nung metsüktsü asoshi ajungshi. Moab lenden nung Mosai Israel nüburtem dang tatemsa ashi, azüng akümstüba ajanga kija aser nüburtem asoshi temoatsüba, saka aküm metsüba ajanga tasüba. Kibuba nungi Mosa dang kechi aru ibaji nüburtem dang sayu, tarutsü pututem aser nüburtem akümstüba alitsü asoshi ajungshi.

Mosai maneni ashi, tenangzükba lima tonger külen Israel nüburtem Yihova Tsüngrem dak mamangba nüburtem den alitsü Azükaru alitsü, jangratema alitsü asoshi senti mapang aika ajurutsü. Saka item ajunga jagi ano lendongtem bena arutsütsü ta pai tekümdangtsü ashi; par sobaliba aser tamangba samatsütsü, asüküm aser khonang nungsang parnoki ajangzükba nung Tsüngrem par sentong nungi pilatsütsü lendong. Aji saka nüburtemi Kibuba dak jenokra, par tesübatem jagi par lenmang shitak aser tarutsü lenmang shitak nung anitsü. Anungji Mosai ashir; "nai parnok metsübuttsüla, Ijip ajak nung Kibuba ne Tsüngremi Farao dak inyakba bilemtetang," "...Kibuba ne Tsüngremi item küm lir lilem lima nung na koda anishi ajak nai bilemtetsüla," "Lilem lima nung nai Kibuba ne Tsüngrem koda ain adokdaksü aji bilemtetang aser tamadok" (Tazüng. 7:18; 8:2; 9:7). "Aser tang, Oh Israel, Kibuba ne Tsüngremi ne dang nungi kechi akhanger? Saka Kibuba ne Tsüngrem tsübuttsü, pa lenmang ajak nung jajatsü, ne mulung ajak agi aser ne nela ajak agi pa dang meimtsü aser tenzüktsü, aser tanü ni nenok nem nenok ajungtsü asoshi agütsüba Kibuba ozüngtem aser pa temelabatem bentshitsü" (Tazüng. 10:12-13).

Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

World Choir Games nung Nagaland Chamber Choir-i Gold ana angu



July 3 nungi July 13, 2023 tashi Gangneung, South Korea nung ayongzüka agiba 12buba World Choir Games tetoktepba nung India tenüng nungi shilem agir The Nagaland Chamber Choir (TNCC) züngsemtem tangokba noksa nung angur.

Dimapur, Chiteni/July 13 (TYO): Gangneung, South Korea nung ayongzüka agiba 12buba World Choir Games tetoktepba nung India tenüng nung shilem agiba telok- The Nagaland Chamber Choir (TNCC)-i Gold ana nguogo. Iba tetoktepba nung TNCC-i category ana- 'Musica Contemporanea Mixed Voices' aser 'Mixed Choir' nung Gold angu.

Iba tetoktepba nung shilem anaji- champions competition aser open competition liasü, aser level balala nung shilem agitsü atema choirs nem maongka

agütsü. World Choir Games ya July 3 nü tenzük aser July 13 nü tembanga liasü.

Choral conductor, Hito Kiholeniba nung TNCC züngsem 30-i iba tetoktepba nung shilem agia liasü aser iba Games nung shilem agitsü atema India nungibo TNCC dang 'qualify' asü.

Nagaland Chief Minister, Neiphui Rio-i TNCC nem tenüngsang agüja twitter ajanga, "South Korea nung World Choir Games nung The Nagaland Chamber Choir-i category ana 'Musica Contemporanea Mixed

Voices' aser 'Mixed Choir' nung Gold anguba atema parnok nem tenüngsang agütsür. Nenoki Nagaland aser India nem naroküm bener arutsüogo. Tarutsü nunga ano takok aika angutsü atema sarasademtsür," ta lemsatop.

Iba jakdang Sri Lanka yimtiba, Colombo nung ayongzüka 4buba Asia Pacific Choir Games aser Grand Prix of Nations nunga TNCC-i Gospel/Spiritual category aser Folklore Acapella category nung shilem agia category anaprongla nungji Silver medals nung liasü.

China nung yimsü temeden mali: Pastor Rev. Pan Yongguang



Rev. Pan Yongguang

July 12, 2023: Tang United States nung jenoka aliba China nung pastor kati Bodhbarnü (July 12) Congress züngsemtem dang, Communist Party-i yimsüsüba linük (China) nung tamangba yimsü temeden mali, ta metetdaksü.

Chinese Communist Party (CCP) indang jembitsü atema House Select Committee-i ayongzüka senden nungji China nung pastor, Rev. Pan Yongguang-i, "China nung chichiba Khristan ka asütsü kanga tasak, aser pastor ka ama ni ibaji jungjunga meteta lir. Tenla kitem nung tekülem sentong tagidak mapang nung tekülem anendaksür, tesem melenshidaksür, ozüng ajanga nokdang mesüra shibangtsür. Iba dak alia Tenla kidang tenla sen-a mesarudaksür," ta ashi. Rev. Youngguang-i, CCP

ketdangsertemi pa indang ministerial training mita repranger aser US nung Reformed Presbyterian Church-i pa ordain sütsüba China anema bendangertem den atongsema külemi inyakba lir, ta tai tongloksür, ta metetdaksü.

Rev. Youngguang-i, pa den par Arogo (Mayflower Arogo) züngsemtemi China toktsür ajenba sülen South Korea-i ao; iba sülen parnok Thailand-i oa jenok aser testüsa taküm April ita nung US nung jenokdaksü, ta metetdaksü.

March ita nung Thailand nung ketdangsertemi par Arogo züngsemtem pua liasü, anungji parnok China-i tanaben meyipa yoktsü ta parnok tsübu liasü saka testüsa US nung jenokogo. Mayflower Church dang 'Shenzhen Reformed Holy

Church dang' taka ajar. Iba Arogo nungi züngsem 63 tashi yaküm September ita tashi Thailand nung liasü aser parnok visa mapang tembangba ajanga Thailand ketdangsertemi apu.

Parnok dang senchi achiba sülen parnok Bangkok nung aliba facility kati anir oa liasü. 2019 küm parnoki China toktsür ajen aser mapang tatsüka South Korea nung aliba sülen Thailand-i arua linük yimtiba, Bangkok nung aliba UN refugee office nung refugee jenjang atema temepishiba agüja liasü.

Iba Arogo nungi Khristanemji tain 28 aser tanur 35 lir aser parnok taküm April ita tetenzüklen Texas (US) tonga oa liasü.

House Select Committee-i ayongzüka kasa sentong nungjisa Uyghur Muslim nung Imam ka, Tibetan Buddhist putir ka aser America nung Khristan lenirtem aikati China nung yimsü temeden anema inyakba indang jembia liasü.

Küm aika China-i Tibet nung yimsü dak sendakba maparen ajak azüoker aser China kübok Xinjiang Uyghur Autonomous Region nung Muslim nungertem reshikangshir.

ANOGO ABEN TSÜNGREM DEN

Ain, Tetsübu Masü

"Kechiyong, Tsüngremi asenok nem tetsübu tanela masü, saka ain aser tazüokba tanela agütsü"

2Tim 1:7.

Tsüngremi Khristan taküm kati tsübu alitsü ajungshibaji, Pa tsübu alitsü ajungshi (2 Kor. 5: 10- 11; Ibri 10: 31) dang ajungshi. Nisung tsübu tsübu Tsüngrem nungi aruba tetsübu masü. Khristanem asoshi tebilemetsüji nisung tsübu tsübu lir. Nisung tsübu jagi Tsüngrem peladaksütsü nokdang, kechiaser nisung tsübu nung parnok tashi ajak lalur.

Timoti asangur ka liasü (1Tim 5: 23). Pa temang nunga tashi mait liasü. Timoti Paul mapang shia obendangdaki aoba aser rishikangshiba metetta liasü. Pauli Timoti dang nisung tsübu tsübu Tsüngrem nungi aruba masü, ta ashi. Tetsübu Tsüngremi asenok dang kechi ashi aji Pai asüngdangtsü tsübu tsübu tsübu. Rishikangshi marudang nai Tsüngrem dang tashi anga lidagi ta bilema alitsü akok, saka kodang rishikangshi aser timtem arudir nai tashi angaa aliba nung nüsasa ratatsü akok. Tetsübu timba memetetta tetsübu lir. Asenok jakdang kechi lir aji asenoki memeteter anungji tetsübu agi asenok puadaksür. Asenok tebilemba agi asenok nangpangdaksür aji asünung asenok tangatetta nungdaker. Asen meketa kechi inyaker aser kechi ataloker itemji asenoki angatettsü tenüngdaksü. Aji agi, Tsüngremi angatetta ama asenoki angatettsü aser Pai anguba ama asenoki angutsü asoshi Pai asenok nem Tanela Temeshi yok.

Tetsübu agi Tsüngrem dang tashi mangatsüba masü. Tanela Temeshi asenok den ali tashi asenoki tsübu alitsü menüngdak. Tetsübu na alar kümdaksür, saka na nüji kümdaksütsü asoshi Yisu aru. Tetsübu nungi anitettsü aser ne nuk lapoktsütsü Tsüngrem dang asüngdang. Pai ne tia jungkai adoktsüba den nai maneni tashia anga alitsü Pai ain agütsütsü.

USCIRF-i Russia Religious Freedom report sangdong

July 13, 2023: July 5, 2023 nü United States Commission on International Religious Freedom (USCIRF)-i Russia linük nung tamangba yimsü temeden anema inyakba report sangdongogo, ta International Christian Concern (ICC)-i metetdaksü.

Tesüba mapangtem nunga Russia nung tamangba yimsü temeden anema inyakba osang aika lir, ajisüaka tawa sangdongba report yabo talisa Russia-i Ukriane amak tenzükba sülen nungi bendenba osangtem teimba lir.

Report nungji tongtibang onük asem lir, aser itemji-Russia osang, Ukraine nung Russia-i ozüng alema inyakba aser Commission-i Russia atema benokba onüktem lir.

USCIRF-i, "Russia ketdangsertemi maneni yimsü temeden anema inyaker aser maneni yimsü amangertem nokdangtsü atema Ukraine rara amshir," ta metetdaksü.

USCIRF report nungsa, tang Russia nung Khristanem anema inyakba, talisa Russian

Orthodox putir, Mikhail Simonov-i sepaitem anema tiyazü osang prok ta aija küm 7 tepuokdak ayutsü obendang agütsüba indang shia lir.

Putir Simonov-i social media ajanga, "Tanurtem aser tetsürtem tepseter, Channel One nung onoki ken atener. Onok, Russia ya Tsüngrem maliba linük kümdaksüogo. Kibuba, onok dang tai tokang," ta metetdaksa liasü.

Ano Orthodox putirsa, Ioann Kurmoyarov-ia Russia-i Ukraine anema raraba aitsüba video prokshiba atema jail nung puokogo.

Kurmoyarov-i, "Rara ayongzükertem kodaki maotsü. Ukraine nung tatalokbatem atema nai mejashira na Khristan masü," ta lemsatapa liasü.

Russia nung nütüng shilem 71 bo Russian Orthodox Arogo züngsemtem lir aser Russia nung yimsü ozüngtem kübok Orthodox Arogo ya 'sobaliba yimsü' ta züngshir, ajisüaka parnok Russia sorkar den mapang ajak nung jungtepa alitsüla.

**AO OSHI ANGAZÜKDAK:
TANÜ ANGAZÜKTSÜBA OJANG**



Renüng

(n) au telung nung tzü aser jana aliba (liquid dirt inside bamboo stem)

* Au nung **renüng** alibatempo tashi maittsü.

Repa

(adv) tanga ka dena külemi inyakba (doing extra work at a time)

* Ni' ozü medemer khu dena **repa** aben.

OLONG PAITEP # 6575

1						2				3
								4		
5		6				7				
8										9
								10		
					11	12				
		13								
14						15				
					16					

TIPLIN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nukla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6574 TELANGZÜBA

TIPLIN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer, 13. Sen,
- 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsütsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.

Tanur kati ball amer aliba ya repranga agüja alibatempo noksatempo mejepeter atongtepang



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Manipur nung jenjang tapet agitsü khanga Aizawl nung longkak ait



Aizawl, Chiteni/July 13

(Agencies): Chin-Kuki-Mizo-Zomi telok; Zo Re-Unification Organisation (ZORO) shirnoki India, Bangladesh aser Myanmar nung aliba Zo nungertem ajak tanaben longjemshitsü atema inyaka arudar parnoki Manipur nung mepetmesü agi kongshir aliba Zo nungertem pusema Aizawl, Mizoram nung longkak aitba sentong ka ayongzüka agiogo.

Longkak aitertemi Ato Kilonser indang noksa rongtokja longkak ait, kechiyong pai iba ken o dak sendakba nung ola matoker aser mepetmesü adoker aliba mazüokteter.

Parnoki Meitei aser Kuki nung tsüngda mangatettep adokba ya Manipur chief minister N. Biren Singh dak tai tonglokja pa indang noksa-a rongtoktsü aser iba den Mairembam Romesh Mangang indang noksa rongtoktsü. Pa ya July 2 nü David Tuolor tekolak tangzüka yoksang asütsü ta temulung melemi bilemer.

Sentong nung o jembiba mapang ZORO tir R.

Sangkawia-i, PM-i ken o dak sendakba nung ola kecha matokba aser kidanger linük nung yimjung bener arutsü atema kecha mejembiba atema pa aija liasü.

Paisa, Kuki-Zo nungertem sentoka toktsüba aser parnok timtem tekangshi mangashi ama toktsüba atema Centre aija liasü.

"India-i Zo nung ya India nung ama magizüker asü? Kibong nung tekolakbai pei chirnurtem anepalur. Centre-i Zo mesüra Kuki nungertem ya kanga tongtibang süa magir ta ni bilemer," ta Sangkawia-i ashi.

ZORO general secretary L. Ramdinliana Renthlei-i ashiba agui, Zo nungertem dak tashiyim amshira Mizo nung lanurtemi joko ojang dang ajema ajema repranga atatsü.

Mizoram nung Meitei nungertem yimjung nung lidar ta ashiba den Renthlei-i parnok dang kümdang alitsü metetdaksü.

Longkak aitertemisa placard balala amer longkak ait, kong "Ato Kilonser nai kodaser alima nung democracy linük tulutiba

nung ita ana tashi kin ka samatsütsü merangba menokdaker," ta zülur liasü.

Parnokisa, Centre dang Kuki nungertem atema administrative set-up balaka amenoktsütsü khanga bangzüng ka yangluogo aser ashiba agi, parnoki maneni Zo nungertem ajak administrative unit ka kübok anidentsü atema nokdaksü.

Manipur nungi nüburtem maneni jenshia odar aser taoba ghonda 24 tsüngda Mizoram-i nisung 93 jena aoba sülen Bodhbarnü tashi nung nisung 12,473 state nung jenoka lir, ta state home department-i ashi.

Manipur nungi jenshia aoba nüburtem nem teyari agütsütsü atema Mizoram-i Centre dang sen crore 10 meshiogo, koba tang tashi magizüki lir, ta ketdangsürtemi ashi.

Centre-i kecha teyari magütsüba sülen state sorkari state aser centre sorkar kübok tenzükerterem, banker tem, corporator tem aser tangar dang nungi tenla meshi tenzükogo, ta parnokisa ashi.

Meghalaya nung coke plant tem raksatsüba ECC-i pelashishia agizükogo

Meghalaya, Chiteni/July 13

(Agencies): East Jaintia Hills nung Elaka Sutnga indang Environment Coordination Committee (ECC)-i, Meghalaya High Court-i tetuyuba agütsüba sülen state nung ozüng alema amenoka aliba coke plant tem raksatsüba atema kanga pelaba lemsatepogo.

Environment Coordination Committee (ECC) lenisüba nung Elaka Sutnga nung alirtemi East Jaintia Hills district nung ozüng alema coke factory tema tali küma aoba indang ashishia liasü.

"Coke plant tem raksatsüba ya mezüngbuba jenjang dang lir aser iba ken o dak sendakba nung kiburtem apusüla aser

Meghalaya State Pollution Control Board (MSPCB)-i kodaser temelaba agütsü iba indang bushitsüla," ta ECC-i ashi.

Ozüng alema amenoka aliba coke factory tem ya July 20 nü tashi nung ajak raksatsütsü imlar.

ECC-i ashiba agi, East Jaintia Hills nung coke plant tem kibur bushitetsü atema ketdangsürtem nem teyari agütsütsü parnok renema. Parnokisa plant tem ya timba tangar tenüng nung inyaksangshidar, ta ashi.

Commission-isa, coke plant tem shibangtsü atema okadak ken o benoker inyaksangshia aliba mapang ka nung MSPCB-

i taküm coke plant tasen asem amenoktsü atema CTE (consent to establish) agütsüba ngutetogo.

ECC-isa, sorkar dang item coke plant tem inyaksangshi mesüi atatsü atema tetuyuba agütsütsü akhangba den sorkari CTE agütsüba tetezü parnoki nüburtem tejangraba süoki ia magir, ta ashi.

Tang tashi nung coke plant teku tashi raksatsüogo. East Jaintia Hills district nung ozüng alema amenokba coke plant 34 nungi ana Bodhbarnü district administration-i raksatsüogo. Iba dak alia West Khasi Hills district administration-i Shallang kübok Kyllonmathei tesem nung coke plant 57 nungi tenet raksatsüogo.

Manipur: Police-i Meitei Leepun tekolakba anema ken o benok

Imphal, Chiteni/July 13

(Agencies): Manipur Police-i, ken o balala dak ajemdaker Meitei Leepun tekolakba Pramot Singh anema criminal case ka benokogo. Ken o nung pai kin balala tsüngda tsükchitep adokdaksütsü atema aser azütokshi lendong adokdaksütsü asoshi inyaksangshiba densema lir.

Osang ajanga ashiba agi, pa anema July 8 nü Kangpokpi police station nung ken o benokogo. Kuki Students Organisation (KSO)-i

tashishiba benokba dak ajemdaker pa anema ken o benoka liasü.

Manipur nung azütokshi lendong atokdaksütsü atema rongmesoba asoshi KSO-i Pramot Singh aser ano Arambai Tenggol ta nungja agütsür aliba tanga telok ka aija liasü.

Temetetsü kaji May 3 nü nungi tenzüka Meitei aser Kuki nungertem Manipur kübok tesem balala nung maneni mangatettep adoka arudar.

May 3 nü tribal temi longkak aiba sentong ka ayongzüka

agiba sülen mangatettep tenzüc aser tang tashi nung nisung 140 taküm samaogo aser nisung 54,000 dak tema pei talidak tesem toktsür jenshiogo.

Kuki Students Organisation-i June 13 nü tashishiba ka benok aser iba dak ajemdaker Information Report (FIR) ka July 8 nü officially benoka liasü.

Iba ken o dak sendakba nung Manipur police-i bushisüngdang tenzükogo aser Pramot Singh anema benoka aliba ken o metentsütsü asoshi kuli bendendar.

Army lenir aitsüba sülen Russian general ka mapa nungi anentsü

Moscow, Chiteni/July 13 (Agencies): Raradak tensa mejungi aliba indang ochi o mitkar lenirtem dang ashiba sülen Ukraine nung pa indang mapa nungi pa anentsüogo, ta Russian general kati ashir.

Maj Gen Ivan Popov ya 58th Army nung commander liasü, aser parnok ya Ukraine kübok southern Zaporizhzhia region nung rara arua liasü.

Voice message ka nung Maj Gen Popov-i ashiba agi, nisung tali asüba aser artillery teyari peria maliba indang pai ola adok.

"Ola madoki alitsü aser tasümaiter akumtsü mesüra kechi ajurua aliar aji shidak ashitsü nungdaka liasü," ta pai ashi.

"Nü tenüng nung, raradak sür aliba kü sepaitem tenüng nung ni tiazi tembitsü temeden mali, anungji ni tibelemtsü ajak angateta jembü."

Iba voice message ya telegram nung Russian MP Andrei Gurulyov-i lemsatapa liasü, shiba taoba mapang military commander ka liasü aser state TV nung teti jembir lir. Ajiüsüka iba message ya kodang mangaokar mejangja.

Ukraine nungeri artillery amshia amakba aridokba nung yariba counter battery system agi anungba aser military intelligence peria maliba amala indang Maj Gen Popov-i pa dang temaba tanishirtem dang ashi.

Senior commander temi pa mapa nungi anentsüsü khanga liasü - shirnok ashikülakertem

ta pai aitsür - aser ibaji Russian defence minister Sergei Shoigu-i agizük.

Moscow nung aliba ketdangsür tem nungi tagitsü osang magütsüdang aiben Russian military bloggers nungi angashir aser parnoki ashiba agi, Maj Gen Popov mapa nungi anentsüsü totuyuba ya Russia indang armed forces tekolakba, Gen Valery Gerasimov nungi aru.

Tongpang nung aliba sepaitem melenteptsü nungdak, ta Maj Gen Popov-i ashiba sülen Gen Gerasimov-i Maj Gen Popov ya 'alarmism' aser ketdangsür yoka achir ka lir ta aitsü.

"Mitkar lenirtemi küdak nungi lendong bener arutsü ama angatet aser ni anema tasa yanglua anogo ka nung defence minister nungi ni mapa nungi anentsüsü totuyuba agütsü," ta Maj Gen Popov-i ashi.

"Tongpang nung Ukraine army temi tejaklen nungi onok meraksatsütet, saka ozü lenirtemi tesülen nungi kongshia tensa tamajungba mapang army tekolak tangzüka yok."

Maj Gen Popov mapa nungi anentsüba atema Russian defence ministry nungi tang tashi osang kecha mali.

Ajiüsüka Maj Gen Popov-i jembüba ajanga MP ajanga "political show" yanglur ta sorkar bukumba United Russia party nungi ketdangsür kati aitsü, kong Gurulyov ya züngsem lir.

"General Popov-i jembüba ya yimjak nung masü aser 58th

Army indang commanders aser sepaitem indang 'closed chats' nung lemsatapa liasü," ta Andrei Turchak-i telegram nung zülutsü.

Maj Gen Popov molungsentsü temürek aser pa ama commander tem asoshi linük nüma tangtetsüla, ta pai ashi.

Ukraine-i meyiper raraba nung Zaporizhzhia aser anüdoklen Donetsk region nung temolung agütsü, koba ita ka jakdang tenzüka saka kanga junga amenoka aliba Russian defensive lines alema moteter.

Bodhbarnüa ano Russian MP kati ashiba agi, taoba Russian commander Gen Sergei Surovikin ya 'anisüngzüker' ta ashi, shiba Wagner teloki sorkar anema longkak aiter yimjak nung mangur.

Gen Surovikin ya Wagner tekolakba Yevgeny Prigozhin den tesendaktep tajung lir ta ashir aser osangtem ajanga ashiba agi, Wagner teloki mapang tatsüka sorkar anema nokdakba sülen Gen Surovikin ya apu.

Tang tashi pa kong aliar ketdangsür nungi tejangja shia mali aser pa indang osang kecha sangdonga mali.

Ano senior Russian general - Lt Gen Oleg Tsokov ya Ukraine indang occupied south coast nung tan hopta tepset, ta ashir, saka Russia indang defence ministry ajanga pa asüba indang tejangja shia mali.

Pita Limjaroenrat-i Thailand PM akumtsü merangba nung tamakok ajuru



Pita Limjaroenrat

Bangkok, Chiteni/July 13 (Agencies): Thailand reformer Pita Limjaroenrat-i election nung takok nguaka ato kilonser akumtsü asoshi parliament nung vote perea mongutet.

May ita election agiba mapang nüburtemi küm ter jungnüa yimsü süa aruba conservative military rule magizük aser Pita-i takok ngua liasü.

Lower house nung Pita'er party ti alliance ajanga menden 312 nguteta lir, saka nungdakba ama vote 375 ngutettsü asoshi züngsem 249 aliba upper house nungi teyari nungdaka liasü, shirnok 2014 küm mitkar tashi amshia sorkar atsüngdokba sülen mitkar temi shima liasü.

Vote agütsüba tembangdang Pita-i vote 323 nguteta liasü, koba senator nungi 13 liasü, ta osang kar ajanga ashir.

Legislator 182-i pa anema vote agütsü aser 198-i vote magütsü.

Mapangtong nung ano Pita anema ken o benoka lir aser pa disqualify asütsü akok. Pai election ozüng meraksa ta ashir.

Osangbener den jembüba, voting mezüng round indang result pai agizük ta ashi saka yangji manentsü, ta shia liasü.

Parliamentary vote agitsü lia progressive Move Forward party lenir Pita-i takok angutsü temolung lema lir ta shia liasü.

"Kü mangdang sayuba nung ni tajungtiba inyaktü merangtsü aser senator temi arendaka bilemba ajunga ni rasaa ashitsü," ta pai ashi.

Lenmang balala nung linük anitsü merangba majority government nokdangtsü merangba liasü, ta arishi küm 42 tain Pita-isa ashi.

"Asen linük nung yimten anitsü asoshi lenmang nung ibai tim dang... Ni ajungmeso aser kü mangdang aser nüburtem mangdang asangsang makum tashi inyaktü imlar," ta pai Thai Rath TV channel dang shia liasü.

Parliamentary züngsemtemi pa anema nokdakba kisüng

masü saka Election Commission ajanga pa disqualify sütsüsüla ta ashiba Bodhbarnü Constitutional Court-i agizüka liasü.

Move Forward lenir anama ashishitep ken o benoka aliba ana asadanger aser kaji media company ka nung pa indang 'shares' aliba indang lir - ajiüsüka iba company ya küm 15 mapa meinyaki arur.

Ano kaji Move Forward ajanga draconian royal defamation lese majeste laws yanglushitsü benokba indang lir - koba ajanga chuba aitsür noklang aika tepuokdak yua lir aser Thailand indang political order ajunga atsüngdoktsü merang, ta ashir.

Constitutional Court yagi kodang iba ken o jembitsüar memetet saka Thailand ozüng nung pa parliament nungi agienaka ato kilonser kumtetsü.

Brehostibarnü parliament senden amentsü lia ato kilonser menden yutsüsang Prayuth Chan-ocha-i pa politics nungi anisüngzüka sangdonga liasü.

Prayuth ya army chief liasü aser pai 2014 küm mitkar tashi amshia yimden atsüngdoka liasü.

Office of the KELINGMEN SENSO MONGDANG

P.O- Changtongya
Dist-Mokokchung, Nagaland

TENÜNGSANG AGÜTSÜR

Kelingmen senso lanur shirnoki NPSC aser NSSB Exam ajangteta asen sensosanger ajak nem takok den konang nüngsang bentsür aruogo nenok ajak dang pelaba iba osang kaket ajanga tenüngsang agütsür.

Tsüngremi maneni nenok wadang nung temoatsü süa len aniangma ta sensosanger ajaki sarasademtsür.

- Kr. TAKUJUNGLA JAMIR.** NPSC PGT in BOTANY (under school education) D/o. Wb. Imtinukshi aser Wt. Samasenla lemtur dena jala.
- Kr. RONGSENNUNGLA.** LDA cum-Computer Assistant. NSSB (Directorate) under Environment, Forest & Climate change. D/o. Wb. T. Meren Jamir aser Wt. Nupuinla Imchen dena jala.

Sd/-
Wb.T.Supong Jamir
President, KSM

Sd/-
Wb. I. Sanen Lemtur
AGS, KSM

Office of the Unger Kosasanger Putu Menden (Village Council)

P.O. Chuchuyimlang, B.P.O. Unger, Pin - 798614
Dist. Mokokchung : Nagaland

KONANG TETUSHI AGÜTSÜR

Unger Kosasanger Putu Menden-i Kr. Sentilla Jamir, D/o. Wb. I. Opang Jamir aser Wt. Temjensongla Imsong jala koba NPSC ajanga (Common Educational Services Examination 2023) 3rd July 2023 nü adoktsüba nung Lecturer in Interior Design under Technical Education nung 1st Rank Position nung takok tulu ngua aser ano maneni Kr. Imnakala, D/o. Wb. Imkongchuba Jamir aser Wt. Sentikumla jala koba Nagaland Staff Selection Board ajanga 9th July 2023 anogo adoktsüba nung LDA cum Computer Assistant (District) PHE Department nung 3rd Position nung takok tulu ngua Unger Yimden aser Sensosanger nem konang nüngsang bener arutsüba atema tena dang kanga pelaba aser tetushi agütsür.

Maneni tarutsü nungtey anglur Tsüngremi nenok taküm aser wadang tali moajang ta sarasademtsür.

Sd/-
R. Tali Imsong
Chairman
Unger Kosasanger Putu Menden

Sd/-
Opanglemba
Council Secretary
Unger Kosasanger Putu Menden

Office of the WATSÜ UNIT UNGER

B.P.O. Unger, P.O. Chuchuyimlang - 798614
Mokokchung : Nagaland

KONANG TETUSHI AGÜTSÜR

Unger Watsü Unit ajanga Kr. Sentilla Jamir, D/o. Wb. I. Opang Jamir aser Wt. Temjensongla Imsong jala koba NPSC ajanga (Common Educational Services Examination 2023) 3rd July 2023 nü adoktsüba nung Lecturer in Interior Design under Technical Education nung 1st Rank Position nung takok tulu anguba asoshi aser ano maneni Kr. Imnakala, D/o. Wb. Imkongchuba Jamir aser Wt. Sentikumla jala koba Nagaland Staff Selection Board ajanga 9th July 2023 anogo adoktsüba nung LDA cum Computer Assistant (District) PHE Department nung 3rd Position nung takok tulu ngua Unger yimtsüng aser yimer yimtsür nem konang nüngsang tulu bener arutsüba atema tena dang kanga pelaba aser tetushi agütsür.

Maneni tarutsü nungtey anglur Tsüngremi nenok taküm aser mapa tali moajang ta sarasademtsür.

Sd/-
Masainla
President
Watsü Unit Unger

Sd/-
Limanungla
Secretary
Watsü Unit Unger

Office of the MONGSENYIMTI SENSO MUNG DANG

B.P.O MONGSENYIMTI, P.O CHUCHUYIMLANG
DIST: MOKOKCHUNG, NAGALAND-798614

KHONANG TETUSHI AGÜTSÜR

Ajemalua Tsüngrem akhümtsüba ranglok nükmen nungi maitsüi meranga azüngba ajanga shishashir mongin kümteta Nagaland Public Service Commission-i ketdangsüba tatidang tamandang ajak kokteta Mongsenyimti sensotsür aseme yimer yimsanger ajak nem khonang tulu ajangzüksüogo, takoker nem tetushi tulu Mongsenyimti Senso Mungdang Mendendi ajanga metangoktsür;

- Kr. Imsüzüngla A. Aier** (Wb. T. A. Yanger Aier aser Wt. Tiamongla Pongen na jala) Asst. Professor (Anthropology) Higher Education.
- Dr. Walosangla Ao** (Wb. Aowati aser Wt. Chubala Aier na jala) PGT (Economics)
- Kr. Lanuienla Ozüküm** (Wb. Purnungsang Ozüküm aser Wt. I. Angangla Aier na jala) PGT (Mathematics)

Nenok sempet tulu den nendaka nongloktsüba wadang meranga inyakra ajanga asen lima temelensi nung molutettsü sensosanger ajak mangdang aser sarasadem.

Sd/-
(IMOTONG)
President, MSM

Sd/-
(OBANGONEN)
Secretary, MSM

33rd Nagaland State Taekwondo C'ship tembangogo

Kohima, Chiteni/July 13 (TYO): Taekwondo Association (NTA)-i ayongzüka asayaba 33buba Nagaland State Taekwondo Championship nung Directorate of Youth Resources & Sports (DYRS) overall champions liasü.

Anogo ana asayaba asayamung nung gold 22, silver 2 aser bronze medal ka ngua DYRS temaba jenjang nung liasü aser parnok sülen Kohima District Taekwondo Association tanabuba jenjang nung liasü. Parnoki goal 11, silver 7 aser bronze 11 ngua ajak senteper medal 29 angu.

Phek District Taekwondo Association-i best disciplined team award ngua liasü.

Asayamung shibangba sentong nung YRS Director Kethosituo Sekhose alakteta jaoker liasü. Pai ashiba agi Taekwondo ya teka aser

tetsüing amshia asayba asaya ka saka iba ajanga taküm azüoka alitsü sayur ta ashi. "Saisapong nung Discipline ya ajak dang tongtibangtiba, kechiyong asayar ka dak sempet laika discipline melira pei nükjidong metongtetsü," ta pai ashi.

YRS director-isa, Chief Minister Neiphu Rio aser Advisor S. Keoshu Yimkhiung na lenisüba kübok state sorkari Nagaland nung saisapong ajungkettsü atema jenjang agidar ta ashi.

Pai, asaya ajak tejakdangi aotsü atema lenmang lapoktsüsü asoshi district ajak nung multi-disciplinary halls yanglutsü atema sorkar sentong lir, ta ashi.

Maneni pai regional aser national jenjang nung NTA asayartemi takok tajung nguteta state nem konang tetushi bener arutsüba atema

tenüngsang agütsüba den iba asaya ajungkettsü atema NTA nem takokba tashi teyari agütsüsü nangzüka liasü.

Kasa mapang nung NTA vice president Visabiu Peseyuie-i tanü tashi nung association-i ajangzükteter alibattem indang tatsü agi lemsatep.

Iba sentong ya NTA secretary Neitho Kuotsu lenisüba nung agi aser NTA secretary (technical) Santsuthung Ngullie-i tepela o jembiba den Nourhengunuo Zatsu-i ken tajung ka tena liasü.

Kohima, Dimapur, Chumoukedima, Wokha, Shamator, Phek, Kiphire, Peren, Tuensang districts aser Youth Resources & Sports aser Nagaland Police nungi ajak senteper asayar 252-i iba asayamung nung shilem agia liasü.

Mirabai Chanu-i anir World Weightlifting Championships asayatsü



Chiteni/July 13, 2023 (Agencies): September ita Riyadh, Saudi Arabia nung asayatsü aliba World Weightlifting Championships nung Mirabai Chanu-i anir India team asayatsü.

Chanu (49kg) dak alia iba asayamung nung Commonwealth Games medallists Bindyarani Devi (55kg) aser Achinta Sheuli (73kg), Shubham Todkar (61kg) aser Narayana Ajith (73kg) nungeria shilem agiba angutsü. Todkar dak alia kasa asayartem ya Asian Games nunga asayatsü.

May ita Asian Championships nung asayaba sülen Tokyo Olympic nung silver medal ngur alila Chanu atema iba ya mezüngbuba asayamung asütsü.

Chanu aser Bindyarani na tang anogo 65 camp ka asoshi St Louis, USA nung oa lir. Tena Dr Aron Horschig kübok training agidar, shiba taoba mapang weightlifter aliba nungi physical therapist aser strength and conditioning coach kümer lir.

"Mira temang anema lir aser onok la tashi taitba kümdaktsüsü asoshi inyaktepar. La Worlds aser Asian Games nung asayatsü," ta national coach Vijay Sharma-

i ashi shiba Chanu den US nung oa lir.

World Championships koba yimya agi küm tatemlen November aser December ita asayar iba asayamung ya September 4 nü nungi tenzüka asayatsü aser anogo 20 majung tsüngda Hangzhou, China nung September 23 nü nungi Asian Games tenzüksü.

Asian Games ya 2024 Paris Olympics atema qualifying asayamung ka asütsü aser Chanu-i tang tashi nung iba asayamung nung dang medal ngua mali.

Chanu ya taoba mapang world champion ka lir aser lai toba küm December ita World Championships asayaba mapanga silver medal nguogo.

2024 Olympic qualification temzüng ozüing kübok 2023 World Championships aser 2024 World Cup ya Olympics nung asayatsüperkem ajaki shilem agitsüba asayamung lir.

Iba asayamung ana dak alia asayartemi 2022 World Championships, 2023 Continental Championships, 2023 Grand Prix 1, 2023 Grand Prix II aser 2024 Continental Championships nungi asayamung asem nungi shilem agitsü nüngdaker.

International Weightlifting Federation (IWF)-i qualification mapa tembangba sülen weight category ajak atema Olympic Qualification Rating (OQR) sangdongtsü.

Asayamung atema India squad yamai alitsü:

Tetsür: Mirabai Chanu (49kg), Bindyarani Devi (55kg)

Tebur: Shubham Todkar (61kg), Achinta Sheuli (73kg), Narayana Ajith (73kg).

Asia Cup: India team Pakistan nung oa masayatsü

New Delhi, Chiteni/July 13 (Agencies): Taruba Asia Cup nung ajaki yonga aliba India aser Pakistan na asaya Sri Lanka nung asayatsü, kechiyong Rohit Sharma-i aiba team ya Pakistan-i maotsü, ta IPL mendenbuba Arun Dhumal-i Bodhbarnü jangjatsüogo.

IPL mendenbubai ashiba agi, Shah-i Asia Cup mapanglem tembanga jembishinütsü atema PCB representative head Zaka Ashraf den ajurutepa liasü.

"Secretary-i PCB tekolakba Zaka Ashraf den ajurutepogo aser Asia Cup atema mapanglem tembanga jembioogo aser mapanglem ya taoba mapang sensaksemba ama dang lir. Asayamung mapang Pakistan nung league asaya pezü asayatsü aser iba sülen India aser Pakistan na asaya densema asaya 9 Sri Lanka nung asayatsü," ta Dhumal-i PTI dang ashi.

Pakistan media nung India team Pakistan-i arua asayatsü ta sangdongba ya Dhumal-i osang shidak masü ta shiogo.

"Iba amala sensaksem kecha maka. India team Pakistan-i maotsü mesüra osang nung atoktsüba ama secretary-a Pakistan-i maotsü. Mapanglem tang tembanga jembioogo," ta Dhumal-i shisem.

2010 küm ama India team Pakistan den Dambulla nung asayatsü imlar. Asia Cup nung Pakistan team par linük nung Nepal den dang asayatsü.

Tanungba asaya asem ya Afghanistan versus Bangladesh, Bangladesh versus Sri Lanka aser Sri Lanka versus Afghanistan lir.

Tawa Pakistan sports minister Mazari-i, Asia cup asayatsü atema India team marura Pakistan team ODI World Cup asayatsü atema India-i maotsü ta shia liasü.

World Cup dak sendakba nung PCB-i, ICC indang Members' Participation Agreement (MPA) sülen anidaktsüsa akümtsü, koba full members temi 2015 küm sign süogo aser iba ya 2023 küm tembangtsü.

"MPA nung sign süatoker lira na tenangzüktepba kübok ICC-i telemtetba agiba tesem ka nung ICC asayamung nung asayatsüsa akümtsü. Ajisiüaka security aser tanga ken o tem yimya agi asadanger. Ajisiüaka security dak sendakba nung kecha tetsükdaktsü maka-ka linük kati asayamung nung shilem magitsü atema telemtetba agira temzüng ozüing kübok mereneshitsü akok mesüra senchi achitsü akok," ta ICC züngsem kati ashi.

Ajisiüaka kasa MPA ya 2025 Champions Trophy nungbo benoka mamshitetsü, koba Pakistan nung asayatsü lir.

Chennaiyin FC-i winger Farukh Choudhary alizükogo



Chennai, Chiteni/July 13 (Agencies): ISL anaben tashi koker aliba Chennaiyin FC-i Mongolbarnü sangdong ka ajanga Mumbai nung soa ainba winger Farukh Choudhary alizükba sangdongogo.

Indian Super League 2023-24 season metenzük tsüngda CFC puri arishi küm 26 tain asayar Choudhary densema asaya tenet alizükogo.

Pa taoba mapang ISL nung Jamshedpur FC densema team

asem nungi asayaogo aser pai iba asayamung nung tajangshiba aika bener arutsü. Pa Jamshedpur FC nungi taoba season pongu tashi asaya liasü, ta kasa sangdong ajanga metetdaktsü.

Kasa mapang nung Choudhary ya 2021 küm SAFF Championship akokba aser 2018 küm runners-up nung tembangba senior national team nung densema liasü. Pai tang tashi nung interntional asaya 14 nung shilem agiogo.

"Ni Chennaiyin FC nung adenba atema kanga pelar. Iba club ya fan temi kanga dang sakloka pusemba club ka lir. Club jenjang tajungba kati ajungkettsü atema temulung ajak agi bendanga agüja asayatsü ni renema lir aser longjemer takok tajung ngutettsü ta temulung lema bilemer," ta Choudhary-i ashi, shibai international asaya nunga goal ka idaktsür lir.

Choudhary, ISL nung mezüngbuba 2016 küm arishi küm 20 asü dang Kerala Blasters FC nungi asaya. Pai tang tashi nung ISL nung asaya 76 asayar lir aser iba mapang goal asem idaktsüba den assist trok süja lir. Pa 2021 küm Mumbai City FC-i ISL akokba team nunga densema liasü.

US Open: Sindhu aser Sennatanabuba round-i iogo

Chiteni/July 13, 2023 (Agencies): US Open Super 300 badminton asayamung mezüngbuba round nung PV Sindhu-i America tsür Disha Gupta aser Lakshya Sen-i Finland nung asayar Kalle Koljonen koka tanabuba round-i iogo.

Tanga tebur kija asaya ka nung S Sankar Subramanian, shiba qualifying asaya ana tashi asayaba sülen main draw-i ia liasü, pai Ireland nung asayar Nhat Nguyen 21-11, 21-16 agi kokogo.

Ajisiüaka India nung asayartem rongnungi B Sai Praneeth, arishi küm 23 tain China nung world No. 7 asayar Li Shi Feng-i tsükdaktsüogo. Tena tsüngda set asem asaya liasü.

Tetsür kija asaya nung Sindhu-i 21-15, 21-12 agi minute 27 nungdang Diksha madak

takok ngua liasü aser kasa mapang nung Sen-ia 21-8, 21-16 agi Koljonen madak ayong ayonga takok angu.

Ajisiüaka Sankar nem Ireland nung asayar Nhat Nguyen-i timtem agüja asaya saka pai asaya 21-11, 21-16 agi kokteta liasü.

Maneni Praneeth-ia second-seeded asayar Shi Feng kanga nongshia asaya saka tatem nung 16-21, 21-14, 21-19 agi asaya makok. Kasa asayamung nungsa Ruthvika Shivani, Chinese Taipei nung asayar Lin Hsiang Ti-i 14-21, 11-21 agi tsükdaktsüogo.

Maneni tebur tarep asayar Krishna Prasad Garaga aser Vishnuvardhan Goud Panjala nati mezüngbuba round majangtet aser tena Chinese Taipei nung tarep Lin Yu Chieh aser Su Li Wei nati 14-21, 14-21 agi kokogo.

BILEMDANGANG

"Anema alidang takokba tashi inyangang."